

## 禪七講義【第 03 堂課】

2020/11/21-27 開仁

### 一切世間不可樂想

《大智度論》卷 23〈序品 1〉(CBETA, T25, no. 1509, p. 232, a9-b21):

「一切世間不可樂想」者，若念世間色欲滋味，車乘、服飾，廬觀、園宅，種種樂事，則生樂想；

若念世間眾惡罪事，則心生厭想。何等惡事？惡事有二種：一者、眾生，二者、土地。

#### (一) 眾生

1、眾生有八苦之患：生、老、病、死、恩愛別離、怨憎同處、所求不得，略而言之，五受眾苦。

2、眾生之罪，

婬欲多故，不別好醜，不隨父母師長教誨，無有慚愧，與禽獸無異。

瞋恚多故，不別輕重，瞋毒狂發，乃至不受佛語，不欲聞法，不畏惡道；杖楚橫加，不知他苦；入大闇中，都無所見。

愚癡多故，所求不以道（不以正道、正確方法），不識事緣，如搆角求乳；無明覆故，雖蒙日照（正法光明），永無所見。

慳貪多故，其舍如塚，人不向之。

憍慢多故，不敬賢聖，不孝父母；憍逸自壞，永無所直。（一旦失敗，身價毫無價值）

邪見多故，不信今世、後世，不信罪福，不可共處。

如是等諸煩惱多故弊敗，為無所直。

3、惡業多故，造無間罪：或殺父母，或傷害賢聖。或要時榮貴（討好時下有錢勢的權貴），讒賊忠貞，殘害親戚。

4、復次，世間眾生，善好者少，弊惡者多。

或時雖有善行，貧賤鄙陋（醜陋）；

或雖富貴端政，而所行不善。

或雖好布施，而貧乏無財；

或雖富有財寶，而慳惜貪著，不肯布施。

或見人有所思，默無所說，便謂憍高自畜，不下接物。

或見好下接物，恩惠普潤，便謂欺誑諂飾（矯飾）。

或見能語善論，便謂恃是小智，以為憍慢。

或見質直好人，便共欺誑調捉，引挽陵易。（欺凌）

或見善心柔濡，便共輕陵踏蹴，不以理遇。

若見持戒清淨者，便謂所行矯異，輕賤不數。（輕視他而不親近他）

如是等眾生弊惡，無一可樂。

## (二) 土地

土地惡者，一切土地多衰無吉，寒熱飢渴、疾病惡疫、毒氣侵害、老病死畏，無處不有。**身所去處，眾苦隨之**，無處得免！雖有好國豐樂安隱，多為諸煩惱所惱，則不名樂土。**一切皆有二種苦：身苦，心苦，無國不有**。如說：

「有國土多寒，或有國多熱，有國無救護，或有國多惡，有國常飢餓，或有國多病，有國不修福，如是無樂處。」

**眾生、土地有如是惡，思惟世間無一可樂。**

欲界惡事如是。上二界死時、退時，大生懊惱，甚於下界；譬如極高處墮，摧碎爛壞。

### (補充)

《增壹阿含 11 經》卷 11〈善知識品 20〉：

爾時，世尊告諸比丘：「**教二人作善不可得報恩**。云何為二？所謂父母也。若復，比丘！有人以父著左肩上，以母著右肩上，至千萬歲，衣被、飯食、床蓐臥具、病瘦醫藥，即於肩上放於屎溺，猶不能得報恩。比丘當知，父母恩重，抱之、育之，隨時將護，不失時節，得見日月。以此方便，知此恩難報。是故，諸比丘！**當供養父母，常當孝順，不失時節**。如是，諸比丘！當作是學。」(CBETA, T02, no. 125, p. 601, a11-19)

《阿毘達磨大毘婆沙論》卷 103：

復次示報恩者真報恩故。如餘經說：苾芻當知！若有孝子一肩擔父，一肩擔母，經於百年處處遊歷，猶非真實報父母恩。**若有孝子能勸父母，於佛法僧因果等法，未信者信信者增長，無淨戒者勸受持戒，有慳貪者勸行惠施，無勝慧者勸修勝慧〔信、戒、施、慧〕，令善安住以自調伏，乃名真實報父母恩**。故此經中教為說法。(CBETA, T27, no. 1545, p. 535, c22-29)

《大智度論》卷 33〈序品 1〉：

如**父母雖有結使諸惡**，以一世利益子故，受其供養，令子得大福；(CBETA, T25, no. 1509, p. 303, c15-16)

《正法念處經》卷 61〈觀天品 6〉：

復次，聞法功德：成就深心，信根清淨，一向淨心信於三寶。詣聽法處，為聞正法，隨舉一足，皆生梵福。若人供養說法法師，當知是人即為供養現在世尊。其人如是隨

所供養，所願成就，乃至得阿耨多羅三藐三菩提，以能供養說法師故。何以故？以聞法故，心得調伏；以調伏故，能斷無知流轉之闇。若離聞法，無有一法能調伏心。

如聞說法，有四種恩甚為難報。何等為四？一者母；二者父；三者如來；四者說法法師。若有供養此四種人，得無量福，現在為人之所讚歎，於未來世能得菩提。何以故？

〔四〕以說法力，令憍慢者得調伏故，令貪著者信布施故，令癡獷者心調柔故，令愚癡者得智慧故。

以聞法力，令迷因果者得正信故。

以聞法力，令邪見者入正見故。

以聞法力，令樂殺生、偷盜、邪婬業者得遠離故。

以此說法調伏因緣，終得涅槃。以此因緣，說法法師甚為難報。

〔一、二、〕父母之恩難可得報，以生身故，是故父母不可得報。若令父母住於法中，名少報恩。

〔三〕如來、應、等正覺，三界最勝，度脫生死，無上大師，此恩難報，唯有一法能報佛恩，若於佛法深心得不壞信，是名報恩。以此供養，亦自利益。

(CBETA, T17, no. 721, p. 359, b7-29)

《阿毘達磨大毘婆沙論》卷 66：

如契經說：佛告苾芻：我實知見有三種人，於諸有情多有所作其恩難報，假使盡形以諸上妙衣服飲食臥具醫藥，及餘資緣而供養之，亦不能報。云何為三？

一者、有人為他說法，令捨家法趣於非家，剃除鬚髮被服袈裟，以正信心受持淨戒。

二者、有人為他說法，令知集法皆是滅法，遠塵離垢於諸法中生淨法眼。

三者、有人為他說法，令盡諸漏證得無漏心慧解脫，於現法中自能通達生已盡等具足而住。

(CBETA, T27, no. 1545, p. 342, b16-25)

《南傳法句經》【了參法師譯】

076.若見彼智者——能指示過失，並能譴責者，當與彼為友；猶如知識者，能指示寶藏。與彼智人友，定善而無惡。